



Broj:
Sarajevo, 04.11.2020. godine

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM
n/r predsjedavajućeg, gđin. Nebojša Radmanović

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO:	05-11-2020		
Organizaciona jedinica	Klasifikaciona oznaka	Radni broj	Broj priloga
01-50-1		2173/20	

Na osnovu člana 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosim

ПОСЛАНИЧКУ ИНИЦИЈАТИВУ

kojom Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da u što kraćem roku, a ne kasnije od 60 dana od dana usvajanja ove inicijative, u skladu sa Zakonom o statistici Bosne i Hercegovine („Službeni glasnik BiH“, br. 26/04 i 42/04), pripremi i u parlamentarnu proceduru uputi Prijedlog zakona o popisu stanovništva, domaćinstava i stanova u Bosni i Hercegovini, kako bi se navedeni popis, u skladu sa međunarodnim standardima, mogao obaviti najkasnije do 2023. godine.

Образложење

Vijeće ministara Bosne i Hercegovine je na 14. sjednici održanoj 29.07.2020. godine usvojilo Program rada Vijeća ministara Bosne i Hercegovine za 2020. godinu. Navedeni Program rada dostavljen je Parlamentarnoj skupštini Bosne i Hercegovine dana 11.09.2020. godine. Pod tačkom 1.4.1.1. predmetnog Programa rada navedeno je sa rokom realizacije „četvrti kvartal 2020. godine“ sačinjavanje Zakona o popisu stanovništva, domaćinstava i stanova u Bosni i Hercegovini. U obrazloženju ovog programskog cilja Vijeće ministara Bosne i Hercegovine ističe da prema članu 8. stav (2) tačka j) Zakona o statistici Bosne i Hercegovine („Službeni glasnik BiH“, br. 26/04 i 42/04) „kada to državni organi budu smatrali neophodnim, Agencija će koordinisati planiranje, vođenje i objavljivanje rezultata popisa stanovništva i domaćinstava Bosne i Hercegovine, u skladu sa Opštim okvirnim sporazumom za mir u Bosni i Hercegovini uključujući i anekse 7. i 10. Sporazuma“. Ova inicijativa ima upravo za cilj da definira stav Predstavničkog doma Parlamentarne skupštine Bosne i Hercegovine, kao najvišeg zakonodavnog i predstavničkog tijela građana u Bosni i Hercegovini, o potrebi da Vijeće ministara Bosne i Hercegovine, odnosno nadležna Agencija za statistiku Bosne i Hercegovine, intenziviraju aktivnosti na pripremi popisa stanovništva i domaćinstava Bosne i Hercegovine. Prvi korak u tom cilju jeste usvajanje Zakona o popisu stanovništva, domaćinstava i stanova u Bosni i Hercegovini, kojim će se, po uzoru na Zakon koji je regulisao popis 2013. godine, utvrditi sadržaj, priprema, organizacija i provođenje popisa stanovništva, domaćinstava i stanova u Bosni i Hercegovini, kao i obaveze državnih i drugih tijela i organizacija uključenih u popis, objavljivanje rezultata i finansiranje popisa.

Ova inicijativa, također, ima za cilj da Predstavnički dom Parlamentarne skupštine Bosne i Hercegovine podrži aktivnosti Vijeća ministara Bosne i Hercegovine iz druge polovine 2019. godine kada je Agencija za statistiku Bosne i Hercegovine zadužena da započne aktivnosti u vezi s pripremama novog Zakona. Međutim, treba imati u vidu da je zbog nedovoljnog angažmana Vijeća ministara Bosne i Hercegovine u posljednjih 10 mjeseci sada dovedeno u pitanje i održavanje popisa stanovništva, domaćinstava i stanova 2023. godine. To je potpuno suprotno evropskoj praksi i međunarodnim standardima. Poređenja radi, popis stanovništva će u 2021. godini u skladu sa Uredbom 763/2008 Evropskog parlamenta i Vijeća za popise stanovništva i stambenih jedinica, provesti sve države članice Evropske unije, kako bi se obezbijedili metodološki harmonizovani i vremenski uporedivi podaci na međunarodnom nivou i time omogućila razmjena podataka između zemalja. Prema informacijama koje imamo, dinamiku Evropske unije po pitanju termina obavljanja popisa stanovništva preuzele su i sve zemlje regiona, kako bi i ove zemlje mogle imati relevantnu komparaciju podataka sa zemljama Evropske unije. Bosna i Hercegovina u tom smislu zaostaje i obavljanje popisa stanovništva 2021. godine bila je idealna prilika da se vratimo u redovni desetogodišnji ciklus zemalja regiona i Evropske unije¹. Kako to definitivno nije moguće, ova inicijativa želi pružiti podršku Vijeću ministara Bosne i Hercegovine da se popis stanovništva, domaćinstava i stanova u Bosni i Hercegovini održi ne kasnije od 2023. godine. Imajući u vidu da je struka stava da bez tri godine intenzivne pripreme nije moguće adekvatno organizovati popis stanovništva, realizacija ove inicijative i programskih ciljeva Vijeća ministara Bosne i Hercegovine mora biti sa oznakom „hitno“ i bez dalje politizacije i odugovlačenja ovog procesa. Ovdje je riječ o tehničkom, a ne političkom pitanju, jer svima u Bosni i Hercegovini je u interesu da imaju ažurne podatke o broju i strukturi stanovništva, kako zbog značajno izmijenjene demografske strukture usljed masovnog odlaska mlađe populacije, tako i zbog adekvatnijeg strateškog i ekonomskog planiranja programskih dokumenata u narednom periodu.

S poštovanjem,

Dr. Denis Zvizdić



¹ Taj desetogodišnji ciklus smo uspješno pratili sve do 1991. godine. S obzirom da je posljednji popis stanovništva u BiH održan 2013. godine, te da naredni može biti eventualno 2023. godine, jedina prilika koja nam ostaje za vraćanje u redovne desetogodišnje cikluse EU jeste 2031. godina.